

## Mbunda - Vanakazi Visoneka - Wives Scriptures

Efeso 5:22-24 Eni vanakazi, ononokeni kuli vanalume veni, ngwe kuli Mwene. 23 Omwo munalume ali na moko ali munakazi wendi ngwe Kilistu lalo ali na moko a cikungulukilo, co Kilistu vavenya ikeye Muyoyesi wa cikungulukilo, muvila wendi. 24 Ngecivene, vanakazi vanapande kwononoka kuli vanalume vavo mu vyoshe, ngwe cikungulukilo mucikononoka kuli Kilistu.

Efeso 5:31,33 Ngwe muvyendeka visoneka ngwavyo, “Omu mukemwo munalume akaseza ishe na vaina nakulipandakana na munakazi wendi, co voshe vavali vakapwa muvila umolika.” 33 Oloni cinenika yeni lalo, munalume woshe napande kuzema munkazi wendi ngwe mwalizema ikeye vavenya, co munakazi woshe napande kusingimika munalume wendi.

- 1 Kolinte 7:3 Munalume alinge na munakazi wendi vije vyamupande, na munakazi lalo alinge mumolika na munalume wendi, co voshe vanapande kushulisa vizango vya umo na mukwavo.
- 1 Kolinte 7:34 co mbunge yendi ilinakumukokela mu vingila vivali. Muzike wa munakazi nambe mumbanda uje kanda alimone na munalume ali na cishota-mbunge ku vipangi vya Mwene, ngeci ajele ku muvila muvila na munzinzime, oloni munakazi wakushomboka ali na cishota-mbunge ku vyuma vya ano a kaye, omwo ashaka kuvwaeleesa munalume wendi.

Kolose 3:18 Vanakazi, ononokeni kuli vanalume veni, omwo eci cikeco munapande kulinga akupwa vaka-Yesu.

- 1 Timateo 2:11-15 Vanakazi vanapande kulilongesa na kwoloka kuluu na kulikeesa kwoshe. 12 Kunjitava ngeci vanakazi valongese nambe kushika akati ka vanalume embwe, vanapande kwoloka kuluu. 13 Omwo Andama ikeye vatangele akulivanga, co asinoni Eva. 14 Co kesi Andama uje vakwisile embwe, oloni munakazi ikeye vakwisile, co wapokwele lishiko lya Njambi. 15 Oloni munakazi vakamwamena akukita vana, nga akakateya mukukulaela na mu cizemo na mukujela na kasingimiko.

Kushangumuka 3:16 Shukulu Kalunga Njambi wendekele kuli munakazi ngwendi, “Njikaamesa manene mushongo a simbu yove yakukita, mwa vushunga vene ukakita vana mu vukalu. Nameme ngoco, cizango cove cikakala kuli munalume wove, ikeye akakushika.”

1 Petulu 3:1,2 Mu cifwa cimo vene, yeni vanakazi munapande kwononoka kuli vanalume veni, ngeci nga umo wavo kakulaela lijwi lya Njambi, vilinga vyeni vikavakokela kukukulaela, 2 omwo vakamona kasingimiko keni na futisi yeni.

Tito 2:1-5 Oloni yove longesa vyuma vije vinalizivasana na vilongesa vya vushunga. 2 Longesa vakulunu ngeci vapwe vaka-kulikongomeka, vaka-mana, vaka-kulinyunga vakevo vavenya, vaka-kushungama mukukulaela kwavo, mu cizemo, na mu lukakateya. 3 Na kuli vakulunu va vanakazi ngoco lalo vanapande kupwa vaka-kulisingimika ngwe muvakalingi vanakazi vaje vayoya yoyesi yakujela. Kuvapandele kupwa vaka-lufwe nambe vapwe vindungo va vinyu. Vanapande kulongesa vyavivwa 4 ngeci valongese vambanda kuzema vanalume vavo, na vana vavo, 5 vapwe vaka-kulinyunga, vajele, co vapwe vaka-kunyunga vinjuvo vyavo, vapwe vaka-kwononoka vanalume vavo, ngeci lijwi lya Njambi kesi valishaule kuli munu umo embwe.

Visimo 12:4 Munakazi wamuvwa napu cuma ca seo kuli munalume wendi, oloni munakazi uje azivilisa shwamwa munalume wendi, napu ngwe mushongo wa lulanga mu vitsiya vya munalume wendi.

Visimo 14:1 Munakazi wa mana, anyunga njuvo yendi, oloni munakazi wa cilema, aviisa njuvo yendi.

Visimo 19:13 Munu wakuluvala-luvala manene wakala mu vukalu vwakama, munu wa cifwa cangacije vanapande kumukwasa simbu yoshe.

Visimo 21:9,19 Mwamuvwa kukala mu cimbimbi ca njuvo yove, kutuvakana kukala mu njuvo amo na munakazi wa kanwa. 19 Mwamuvwa kukala mu mambo, kutuvakana kukala na munakazi wa kanwa nakulinyenyeta.

Visimo 25:24 Mwamuvwa kukala mu cimbimbi ca njuvo yove, kutuvakana kukala mu njuvo amo na munakazi wa kanwa.

Visimo 27:15,16 Munakazi wa kanwa napu ngwe muwakandweke mema a nyonzi ya mungole. 16 Cinapu cuma cacasi kukwata lihunzi nambe kukumateya mazi mu livoko lyove, kutuvakana kwolwesa munakazi wa kanwa.

Visimo 31:10-31 Munakazi wa seo iyajo asa kumuwana? Seo yendi inatuvakana mamanya a lumbi! 11 Munalume wendi wamukulaela, co kakapu kautu. 12 Matangwa akuyoya kwendi oshe, akalingila munalume wendi vyuma vyavivwa, kesi vyavivi embwe. 13 Akakala na cipangi cakutonga maka a vimanga na vuzalo vwa linyu. 14 Napu ngwe vwato vwa vaka-kulandesa vuje vunena

vyakulya vyendi kutunda kulyala. 15 Enduka omo kanda litangwa lituuke, mukuvwaesela naanga yendi vyakulya, nakuleka vangamba vendi va vambanda vije vivanapande kupanga. 16 Akulivanga ayongola mu mbunge yendi kulanda lihya na vimbongo vije vyakawana, co akunamo mikolovozi ya vushuka vwa vinyu. 17 Muka-kuundangana manene, muka-nzili nakupanga mwamuvwa. 18 Azivuka seo ya vyuma vyoshe vyalinga, co apanga na nzili noo mukati ka vutsiki. 19 Livoko lyendi limo nakwata citi cili na mukamango wa vwanda, co livoko lyendi likwavo nakwata limbambale lyakwombwesa vwanda. 20 Ikeye wakala na cizemo kuli vaka-kuutwa, na kuli vaka-kujeneka. 21 Ikeye kesi kulinyenyeta omo kuli lisika, omwo naanga yendi vali na vuzalo vwa ntwima. 22 Akatongela vinanga a vulili, co akazala vuzalo vwavuvwa vwa linyu vwakuvenguluka. 23 Munalume wendi vamuzivuka, omo akakala akati ka vakulunu va mu nganda. 24 Munakazi ou akatongo vuzalo na miva, co avilandesa kuli vaka-kulandulula. 25 Wapwa muka-nzili na kasingimiko, co kesi kulishoshomwena na vyuma vije vikaija kulutwe. 26 Akendeka na lyovwa-owwa na mana. 27 Simbu yoshe muka-kuundangana, co akenga vije vanajeneka naanga yendi. 28 Co vana vendi vakamwesa kuvwaelela kwavo, co munalume wendi amushangazala, 29 nakwendeka ngwendi, “Vanakazi va seo vavangi, oloni yove u wa seo manene kutuvakana voshe.” 30 Citso ca munu cikakwisa, na vuvwa vwa cihanga cendi vwapwa vwangoco, oloni munakazi uje asingimika Shukulu Kalunga vakamushangazala. 31 Mwaneni cikandeleta a vije vyoshe vyakapanga. *Vanu voshe vanapande kumusingimika.*

Pastor T. John Franklin  
Church of Salvation, Healing, and Deliverance  
COS-HAD.org